



JUDICIAL SYSTEM MONITORING PROGRAMME

PROGRAMA MONITORIZASAUN BA SISTEMA JUDISIÁRIU

Komunikadu Imprensa

27 Abril 2015

Tribunál Distritál Oe-Cusse

Tribunál Distritál Oe-cusse julga kazu koletivu sanulu-resin lima no kazu singulár tolu durante semana rua nia laran

Iha 13 to'o 24 Abril 2015, Tribunál Distritál Oe-Cusse liuhosi tribunál koletivu no singulár hala'o prosesu julgamentu ba kazu 18 ne'ebé kompostu hosi kazu krime 17 no sivil 1.

Kazu hirak ne'e involve kazu krime 17 ne'ebé kompostu hosi krime maus tratus ba kónjuje 5, maus tratus ba menor 1, tentativa violasaun seksuál 1, koasaun seksuál 2, interupsaun ba gravides 1, danu agravadu 1, abuzu seksuál ba menor 3 no kondusaun sem karta 3. Entretantu kazu sivil ida mak involve revindikasaun (*klaim*) ba propriedade.

Hosi kazu 18 ne'e kazu 6 mak tribunál konklui ona nia prosesu, kazu 10 marka fali agenda ba leitura akordaun ba semana ikus fulan-Abril 2015 ne'e nia laran, kazu ida kona-ba interupsaun ba gravidez sei kontinua iha Maiu no kazu revindikasaun mak adia to'o fulan Setembru tanba parte sira la marka prezensa.

“JSMP apresia esforsu Tribunál Distritál Oe-Cusse atu kordena no realiza julgamentu ba kazu koletivu sira iha tribunál refere. Julgamentu ne'e importante tanba bele hatan ba interesadu sira ne'ebé hein hela sira nia kazu durante tempu barak tebes antes hetan solusaun tanba deit kestaun rekursu umanu,” dehan Diretór Ezekutivu JSMP, Luis de Oliveira Sampaio.

Durante ne'e Tribunál Distritál Oe-Cusse so iha deit juis nain ida, ministériu públiku nain 1 no defensor públiku nain rua. Tanba ne'e difisil teb-tebes ba Tribunál Distritál Oe-Cusse atu marka julgamentu ba kazu sira ho kompozisaun juis koletivu kuandu la kordena no hetan apoiu hosi Tribunál Distritál Dili.

Tribunál koletivu mak tribunál ida ho kompetensia atu julgamentu kazu krime sira ne'ebé nia matéria penál fo fatin pena prizaun ho limite maximu tinan lima ba leten tuir artigu 14 Kódigu Prosesu Penál. Enkuantu tribunál singulár mak tribunál ne'ebé ho kompetensia atu julga kazu sira ne'ebé la tama iha kompetensia tribunal koletivu nian tuir artigu 15 Kódigu Prosesu Penál.

JSMP observa katak maioria kazu sira ne'e rejista iha tribunál entre tinan 2014 no tinan 2015 no úniku kazu revindikasaun ba propriedade mak rejista iha tribunál desde 2010.

Tuir planu, Tribunál Distritál Oe-Cusse planea atu prosesu julgamentu ho kompozisaun koletivu ne'e durante semana ida, maibé tanba tempu la sufisiente tribunál decide hodi prolonga tan julgamentu ba semana rua.

Antes ne'e iha 22 Abril JSMP produs ona Komunikadu Imprensa ida ho titlu: Julgamentu koletivu ba krime violénsia bazeia ba jéneru iha Tribunál Distritál Oe-cusse. Komunikadu Imprensa ne'e foka deit ba kazu violénsia bazeia jeneru ne'ebé julga iha semana primeriu nia laran no bele asesu iha : www.jsmp.tl parte publikasaun komunikadu imprensa 2015.

Julgamentu ne'e prezide hosi juis koletivu Dr. João Ribeiro nu'udar juis Presidente no membru juis nain rua hosi Tribunál Distritál Dili mak Dra. Zumiaty Freitas no Dra. Francisca Cabral. Ministériu Públiku representa hosi Dr. Ambrosio Rangel Freitas no Dr. Jacinto Babo no arguidu sira hetan akumpaña hosi defensor públiku, Dr. Calisto Tout no Dr. Afonso Gomes Fatima.

“Kommunikadu imprensa/Sumariu kazu ida ne'e bele imprimi tan ho apoiu jenerozu husi povu Amerikanu liu husi Ajensia Estados Unidos ba Dezenvolvimentu Internasionál (USAID) bazeia ba Akordu Kooperasaun ho Número AID-486-A-13-00007 ba programa Ba Distrito iha Timor-Leste, ne'ebe nia implementasaun lidera husi Ajensia Counterpart International ho nia parseiru sira. JSMP mak responsabiliza tomak ba konteudu no hanoin iha komunikadu impresna ida ne'e nia laran no la nesesariamente releta USAID ka Governu Estados Unidos Amerikanu nia opiniaun”.

Atu hetan informasaun kompleitu, favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org
Telefone:3323883 | 77295795
Website: www.jsmp.tl
Face book: www.facebook.com/timorleste.jsmp
Twitter: @JSMPtl